

AGRICOLTURA

Parc Ela/Uniun purila Alvra: campiunadi digls pros

50 pros èn annunztgias

●pb. Chegl ègl anc mai do. An mintga cass tar nous betg: en campiunadi per igl pi bel pro. Per chell'idea tgi igls responsabels digl Parc Ela on mess a strada ansemen cun l'Uniun purila Alvra dattigl gio 50 annunztgias. Cunter la fegn digl meis e l'antschatta da l'oter vo la giuria a far viseta agls pros.

Mintga pour veva la pussebladad dad annunztgier dus pros per categoria. E las dus categorias èn «extensiv» e «pac intensiv». Annunztgias èn 24 pros ainten la categoria «extensiv» e 26 tar «pac intensiv». «La gronda part digls pros annunztgias è surmang, angal pacs giu la val», dei Regula Ott tgi represchainta igl Parc Ela aint igl comite d'organisaziun. «Uscheia vaina anc en gnoul taimp anfignen tar la viseta antras la giuria». Igls 50 pros annunztgias vignan da 12 cumegns differents. Igls pi bliers vignan digls cumegns Riomp-Parsonz (11) e Salouf (9). Betg represchentos tranter las annunztgias èn igls cumegns digls Mulegns, Tinizong-Rona, Casti, Alvaschagn, Surava, Brinzauls, Farrera, e Tagn. Igl perimeter era fixo cun igls cumegns digl Parc Ela.

Collaboraziun pours e Parc Ela

L'antiera premiaziun duess alla finala betg angal esser ena tgossa da sensaziun. Igls organisatours dall'Uniun purila Alvra e digl Parc Ela on diversas fegnameiras. Egna è da far attent la publicitad a prestaziuns spezialas dalla nossa agricultura per igl mantignamaint dad ena cuntrada culturala. En intent turistic è er da mussar agls noss giasts la bellezza e la gronda diversitad digls noss pros. En ulteriour muteiv è dad animar igls pours sez e da lascher davanter ella dischiants da mantignair chella diversitad dalla prada e dad ager correspondentamaintg an lour lavour da mintga de segl fons.

Naturalmaintg duess er igl Parc Ela survaigner cotras ena ulterioura plattafurma per saveir sa posiziunar scu attracziun turistica cun ena retga cuntrada naturala.



Igls responsabels principals per l'organisaziun digl campiunadi digls pros: Regula Ott per igl Parc Ela ed Andreas Stgier dall'Uniun purila Alvra.

E betg igl davos duess igl campiunadi digls pros er sarveir scu fundamaint per ulteriouras occurrenzas partenarias e purscheidas da tot gener an collabraziun tranter agricultura e Parc Ela. Da totas dus varts ins vei en grond potenzial da collaboraziun e sinergieas tranter igls dus partenaris. Ed er da vart dalla politica vign racumando dad intensiviar tant scu pussebel igl contact tranter pours e turissem. Bleras pussebladads da collaboraziun èn anfignen ossa stadas critgas.

Lavour seriousa dalla giuria

An vista alla muntada digl campiunadi digls pros vottan igls organisatours er far lavour seriousa cun la premiaziun digls pros. Chella sa cumpona da quatter persungas: Ueli Heinrich Filisour, pour; Madlaina Felix, amprendista da poura a Stierva; Linard Sonder, Salouf, student; Batist Spinatsch, Savognin, cunsiglieder puril e Regula Ott, Casti, Parc Ela.

Igl taimp dalla fluriziun sen la madema otezza è ple u manc daptot igl madem taimp. Uscheia sa concentrescha la lavour dalla giuria sen en pèr deis. Tenor experientschas tg'ins ò fatg an oters lis ins vign da giuditgier 8–10 pros an de. Chegl vot deir tg'ins dovra tranter 5 e seis deis. Previa è er en de scolaziun per igls commembers dalla giuria. E chegl an chella direcziun, tg'ins fixescha igls criteris per la valutaziun digls pros e mademamaintg en sistem, uscheia tgi la premiaziun so er neir taxada scu gista ed objectiva.

(La Pagina niro ad accompagnar en de la giuria ed a rapportar sur dalla sia lavour.)

Premiaziun igl settember

Digl reminent vignan tot igls pros annunztgias tg'ins vei da veias e sendas anor signias cun ena tavla d'infurmaziun.

Avant tgi vign do ancunaschaint igls resultats dalla premiaziun

dattigl anc ena festa digls pros, numnadamaintg la dumengia digls 13 da fanadour 2008 a Lantsch. Chegl è en project comunabel tranter igl campiunadi digls pros ed igl concept ecologic Lantsch-Brinzauls. La fegnameira da chesta festa è far per giasts ed indigens ena guidada tras igl pros. E l'ò declarar d'ena vart la diversitad dallas flours ed ervas e la valeta scu pavel e da l'otra vart infurmar sur digl project ecologic ed ansomma sur dallas prestaziuns ecologicas dalla agricultura. Chel de on igls preschaints er la pussebladad da far en'atgna giudicaziun sur digls pros tenor ena metoda pi simpla. Organizada vign la festa digls pros ansemen cun la societad da tratga da biestga da Lantsch an contact er cun igls pours da Brinzauls.

La premiaziun digl campiunadi digls pros è alloura igls 20 da settember an connex cun la scargeda d'alp a Parsonz.